

## ADYAYA I

### PURWAKA

#### 1.1 Dadalan Pikobet

Pamlajahan *inovatif* inggih punika pamlajahan sane nguratiang tata titi pikayunan sisia mangda seneng malajah tur prasida nglimbakang Pamlajahan sane katerima (Guanabara dkk., n.d.). Pamlajahan *inovatif* kaaptiang mangda prasida nuntun sisia urati tur *aktif* ring kelas taler sisia ngrasayang seneng rikala nyarengin peplajahan pamekasnyane paplajahan basa Bali. “Seneng lan nau malajah” kadadosang unteng pamargi ring pamlajahan *inovatif* (Khotimah, 2021). Ring abad 21, pamlajahan *inovatif* madue tuntutan ring guru pinaka wit widya kaicen majeng ring sisia mangda ngajahin tur ngalaksanayang parikrama ring kelas prasida *efektif*, taler prasida ngawangun sajeroning kawagedan soang-soang sisia (R. Rahayu dkk., 2022). Indike punika matetujon mangda wenten panglimbak sisia malarapan antuk saluir kaweruhan lan kawagedan ring sajeroning pamlajahan. Imbanyane sekadi sekadi kawagedan *inovasi* lan pamlajahan, kawagedan gatra, *media* lan *TIK* (Maru’ao, 2020). Duaning asapunika, pamlajahan puniki kaaptiang mangda prasida ngawigunayang utawi nganutin *metode* miwah *metode* pamlajahan sane *efektif*, *interaktif*, *saintifik*, *kontekstual* manut makudang-kudang KD sane prasida kalaksanayang (Muhali, 2019).

Pamlajahan *inovatif* inggih punika pamlajahan sane prasida nepasin pikobet sane wenten ring kelas manut kahanan ring kelas, dadosne pamlajahan puniki ngangge *strategi*, *Metode* utawi usaha nincapang kawagedan sane

becik (G. D. S. Rahayu & Firmansyah, 2018). Pidabdab pamajahan puniki karancang, kasusun, miwah kaanutang sareng sisia rikala malajah. Sajeroning pamajahan sane kasarengin olih sisia, pangresep an sisia dados pahan sane mabuat pisan. Riantukan mawit saking kawentenan puniki pamajahan sida kakawitin. Paiketan pantaraning sisia lan guru dados paiketan sane mabuat tur sida ngicenin pangweruhan (Kesuma dkk., 2019).

Yening nuek saking kawentenan sistem pamajahan sane nuntun lan ngicen pamargi mangda sisia sane nyarengin peplajahan prasida aktif ring kelas mangda anut sareng pamajahan *real teaching*. Sakewanten nenten samian guru prasida ngawigunayang sekadi punika ring pamajahan, sekadi silih tunggilnyane SMAN 1 Pekutatan. Yadiastun kabaos sekolah *favorit*, sakewanten utamannayane ring pamajahan basa Bali guru kantun meweh rikala ngamargiang pamajahan ring sisia. Guru madue sesana ngajahin tur nincapang kawagedan sisia, guru sane *kreatif* pastika makarya *metode* utawi pidabdab miwah nyantenang media sane pacang kanggen mangda tatujon pamajahan punika prasida kapanggih. Punika taler ring pamajahan basa Bali sampun sepatutnyane nganggen *metode* sane anut, sumangdane pamargin pamajahan prasida antar lan becik.

Sadurungnyane praktiksa riin sane sampun kalaksanayang penilik ring SMAN 1 Pekutatan majalaran antuk sadu wicara majeng ring guru basa Bali kelas XI MIPA 1, Ni Wayan Parwati, S.Pd nelatarang ring pamargin peplajahan nyurat sampun nganutin tuntutan *Kurikulum*, tur kapolihang gatra yening kawagedan nyurat pupuh sisia kantun kirang kresep taler sisia nenten seneng. Riantukan *metode* sane kaanggen guru kirang becik. Sisia ngrasa

yening ngrereh daging pikayunan anggen nyurat punika kabaos meweh napi malih yening nyurat pupuh utamanyane nganggen basa Bali alus. Sisia taler masoang yening ipun arang malajah masasuratan. Pikobet punika mapaiketan sajeroning pamargi paplajahan sane kamargiang olih guru, inggihan punika guru kantun nganggen tata cara *konvensional* inggih punika nganggen tata cara *metode* ceramah sane ngawinang paplajahan punika kari maunteng ring teori dadosnyane kawagedan sisia kirang polih uratian. Guru sapatutnyane nlatarang daging ajah-ajahan nganggen tata cara, *media/metode* pamlajahan sane anut miwah mangda prasida ngardinin aab sane becik ring kelas.

Wenten makudang-kudang tata cara utawi *metode* sane prasida kaanggen olih guru ritakala ngajahin. *Metode* inggih punika tata cara sane kaanggen mangda mgawetuang tetujon peplajahan (Yuwanita dkk., 2020). Wenten *Metode* sorohnyane sekadi *ceramah, tanya jawab, karya wisata, drill, Metode Copy The Master* miwah sane tiosan. Antuk punika patut pisan wenten usaha anggen natasin utawi muputang pikobet-pikobet ring ajeng. Silih tunggil usahanyane inggih punika nganggen tata cara, *teknik* utawi pangrencana sane patut, sumangdane peplajahan nyurat puniki kabaosang *kratif* punika mawinan panilik pacang nganggen *metode Copy The Master* anggen natasin pikobet punika.

*Metode Copy The Master* inggih punika silih tunggil *metode* sane kaanggen ring sajeroning peplajahan nyurat pupuh sinom. Manut (Putri, 2017) *Copy The Master* inggih punika tata cara nyurat sane nganikain para sisia mangda prasida nganutin *metode* utawi *master* sang sane waged. Manut (Indriyani & Ningsih, 2023) tata cara *Copy The Master* inggih punika tata cara

anggen ngalimbakang daging pikayun lan rerambangan (*imajinasi*) siswa sajeroning nyurat pupuh.

Manut saking kalih panampen para sujane punika prasida kacutetang *metode Copy The Master* inggih punika tata cara nyurat nginutin sang sane waged antuk ngicenin para siswa imba pupuh *master* mangda polih nuutin wangun, pengubah, unteng, utawi tata cara sesuratan punika. *Metode* puniki pinaka lalintihan ring sajeroning tata titi pamlajahan sane mapangapti mangda siswa nginutin sang sane kanggen pinaka imba nyurat pupuh saha ngalimbakang kawagedan masasuratan soang-soang. *Metode Copy The Master* puniki madue kaluwihan sane matiosan sareng *metode* sane lianan inggih punika prasida ngawantu ngalimbakang daging pikayun utawi *imajinasi* siswa antuk nyurat, nincapang rasa meled siswa mapauruk nyurat pupuh sinom lan prasida nguningin imba sane sampun katampilang olih guru taler kaaptiang saking imba punika siswa prasida nginutin antuk napi sane sampun kapolihang. Antuk kaluwihan taler kawigunannyane, *metode* puniki pinih becik kaanggen ring pamlajahan utamannyane kaanggen nincapang kawagedan nyurat.

Kawagedan nyurat punika madue peranan sane ageng majeng ring sajeroning peplajahan siswa, minakadi makarya utawi muputang indik tugas-tugas akademik ring sekolah rikala polih peplajahan nyurat. Nyurat inggih punika silih tunggil kawagedan mabasa sane karasayang meweh olih para siswa, peplajahan nyurat sane wenten ring silabus kelas XI SMA inggih punika peplajahan nyurat pupuh sane wenten ring Kompetensi Dasar (*KD*) 4.7 “Memproduksi satu bait pupuh dengan tema tertentu”. Peplajahan nyurat pupuh pinih utama pisan ring sekolah menengah atas. Riantukan pupuh

prasida kadadosang sarana ngawedarang daging pikayunan. Manut (Widiantari dkk., 2019) nyurat inggih punika pamargi mapapineh manut reragragan sane becik ring sajeroning ngawedarang daging pikayunan sane nganggen basa sasuratan. Lianan punika manut (Sukirman, 2020) taler mosang nyurat pateh sakadi kawagedan mabasa inggih punika pamargi nglimbakang, nyurat prasida kapolihang saking pemargi lan galah.

Pamlajahan nyurat pupuh inggih punika silih tunggil pamlajahan sane kaaptiang sumangdane sisia prasida ngawedarang daging pikayun nganggen basa taler ring sajeroning nyurat mangda madue pemargi sane becik. Kawagedan nyurat sisia punika nenten samian pateh, silih tunggilnyane ring sajeroning nyurat pupuh. Wenten sisia prasida nyurat pupuh sane becik lan wenten sisia sane tiosan durung prasida nyurat pupuh sane becik. Saking makudang-kudang pupuh sane wenten, panilik pacang nilikin indik nyurat pupuh sinom, mawinan parindikan kawagedan nyurat pupuh sinom ring sisia SMAN 1 Pekutatan kantun kirang taler sisia maosang meweh lan merasa asing kapining pupuh sane kaplajahin utamannyane pupuh sinom.

Lianan punika pupuh puniki madue kaluwihan anggen ngawetuang manah inggih punika pupuh sane anggen ngunggahang keramah-tamahan, liang, mituturin anak miwah mareraosan. Nganggen 10 carik sane apada lingga tur nganutin uger-uger suara sekadi 8a, 8i, 8a, 8i, 8i, 8u, 8a, 8i, 4u, 8a ring unkur (Ginada dkk., 2020). Panilik ngaptiang mangda sisia dangan nyurat pupuh sinom nganggen sasuratan sane lumrah utawi sane dasar. Sajeroning pupuh punika wenten titi pamlajahan sane pinaka dasar miwah panuntun mangda para sisia dangan mlajahin.

Pamlajahan nyurat pupuh ngawigunayang *metode Copy The Master* sane pacang kamargiang antuk makarya pupuh sane manut *media gambar (ilustrasi)* sane kaicenin, sadurung punika guru mangda nyagayang materi imba pupuh sinom sane kakaryanin. Kapertama guru mangda nyayagayang materi pamlajahan sane mawentuk materi imba pupuh utamanyane pupuh sinom sane anut ring pamlajahan. Selanturnyane guru patut ngelaksanayang pamlajahan ring kelas nganggen media sane sampun kasayagayang.

Sajeroning pamlajahan punika, guru mangda ngicenin materi ngenenin indik tata titi utawi uger-uger rikala nyurat pupuh sane pacang kawacen olih sisia. Guru taler nganikain para sisia sane dereng ngresep mangda mapitaken, sisia sane lianan prasida nyawis utawi mapenampen. Yening sampun sami kresep utawi nenten wenten malih sane mapitaken para sisia ngelanturang makarya nyurat pupuh taler sisia pacang kaicenin gambar (*ilustrasi*), saking gambar punika kaaptiang mangda sisia prasida ngawedarang daging pikayunnyaane manut gambar punika. Pikolih sesuratan pupuh sinom saking sisia mangda kawacen ring arep kelas, taler sisia sane lianan prasida nampenin pikolih sesuratan soang-soang. Sewusan kawacen pikolih sesuratan sisia mangda kapupulang nganutin pawarah-warah saking guru.

Sadurungnyane sampun wenten tatilikan asoroh sane naenin indik peplajahan nyurat miwah sampun wenten sane nganggen *metode Copy The Master*. Tetilikan sane ngawigunayang *Metode Copy The Master* sampun naenin kalaksanayang olih para panilik. Panilik sane sampun ngawigunayang inggih punika tetilikan olih (Anggreningsih, 2021) ring tetilikannyaane mamurda *Metode Copy The Master* Nincapang Kawagedan Ngwacen Teks

Ugrawakya Sisia kelas SKS SMP Negeri 1 Singaraja. Pabinayan tetilikan puniki sareng tetilikan dumun inggih punika kapartama ring materi sane kaambil, kaping kalih ring *objek* lan genah tetilikan taler media sane pacang kaanggen. Materi tetilikan sane kaanggen puniki kaambil saking buku Widia Sari kelas XI, *objek* tetilikannyane inggih punika sisia kelas XI MIPA 1 SMAN 1 Pekutatan, sane nganggen *media* marupa gambar (*ilustrasi visual*).

Saking tatilikan ring ajeng, dadosne durung wenten sane nganggen *Metode Copy The Master* ring sajeroning nyurat pupuh, sane mangkin panilik pacang nganggen *metode* punika ring sajeroning anggen nincapang kawagedan nyurat pupuh. Malarapan antuk dadalan pikobet sane sampun katlatarang punika, kawentenan *metode Copy The Master* dahat mabuat pisan kaanggen nincapang kawagedan nyurat majeng ring sisia anggen paweweh ring sajeroning muputang pikobet paplajahan nyurat pupuh tur ngresepang indik tata cara nyurat pupuh ngantos kawagedan sisia punika nincap. Pidabdab nganggen *metode Copy The Master* puniki taler guru prasida uning kawagedan sisia, kaiwangan-kaiwangan, miwah ngicenin paweweh sajeroning makarya pangrencana, tata cara sane patut lan becik anggen nincapang kawagedan sisia ring sajeroning peplajahan nyurat. Punika mawinan panilik pacang nganggen *metode Copy The Master* antuk nglaksananyang tetilikan sane mamurda “*Metode Copy The Master* kaanggen Nincapang Kawagedan Nyurat Pupuh Sinom ring Sisia Kelas XI MIPA 1 SMAN 1 Pekutatan”.

## 1.2 Ngrereh Pikobet Tetilikan

Sajeroning tetilikan puniki, panilik manggihin makudang-kudang pikobet sane prasida katilikin lan mapaiketan sareng dadalan pikobet sane sampun kabahbahang ring ajeng. Pikobet sane sampun kapolihang punika melarapan antuk *metode Copy The Master* mangda prasida nincapang kawagedan sisia nyurat pupuh sinom. Pikobet sane sampun kapolihang minakadi, (1) Guru wantah ngicenin materi nganutin tata cara manut napi sane wenten ring buku pelajaran, (2) Sisia meweh ngelimbakang daging pikayun utawi *imajinasi* rikala nyurat, (3) Galah pamlajahan kantung kirang rikala anggen ring pamlajahan nyurat, (4) Sisia gelis med rikala nyarengin peplajahan saha pangresep sisia kantung kirang duaning *minim* malajah, (5) Guru durung nganggen *metode* pamlajahan sane *inovatif*. Punika mawinan sisia punika nenten meled nyarengin pamlajahan ring kelas utamannnyane ring pamlajahan nyurat pupuh sinom, silih tunggilnyane ring kelas XI MIPA 1 SMAN 1 Pekutatan.

## 1.3 Ngwatesin Pikobet Tetilikan

Ring sajeroning tetilikan sane jagi kalaksanayang, panilik nureksain malih pikobet sane sampun karereh. Pikobet punika kawatesin riantukan wenten makudang-kudang parindikan minakadi, tetilikan kabanda antuk galah, ngicenin peluang majeng ring panilik lianan mangda prasida antuk selanturnyane nyangkepin lan ngamargiang tetilikan manut kaweruhan widya sane lianan. Malarapan antuk pikobet punika, tetilikan puniki ngwatesin pikobet wantah ngawigunayang *metode Copy The Master* anggen nincapang



kawagedan nyurat Pupuh Sinom ring sisia kelas XI MIPA 1 SMAN 1 Pekutatan. Kawentenan nganggen *Metode Copy The Master* mangda prasida nepasin pikobet-pikobet sane wenten ring pamlajahan, taler ngamolihang penampen majeng ring sisia ring kawentenan *metode Copy The Master* sane kaanggen nincapang kawagedan nyurat Pupuh Sinom sisia kelas XI MIPA 1 SMAN 1 Pekutatan.

#### 1.4 Bantang Pikobet Tetilikan

Malarapan antuk dadalan pikobet ring ajeng, prasida karincikang bantang pikobet inggih punika :

1. Sapunapi pidabdab sajeroning paplajahan sane kamargiang guru ngawigunayang *Metode Copy The Master* kanggen nincapang kawagedan nyurat Pupuh Sinom ring sisia kelas XI MIPA 1 SMAN 1 Pekutatan?
2. Napike *Metode Copy The Master* prasida kaanggen nincapang kawagedan nyurat Pupuh Sinom ring sisia kelas XI MIPA 1 SMAN 1 Pekutatan?
3. Sapunapi penampen sisia ring kawentenan *Metode Copy The Master* sane kaanggen nincapang kawagedan nyurat Pupuh Sinom ring sisia kelas XI MIPA 1 SMAN 1 Pekutatan?

#### 1.5 Tetujon Tetilikan

Malarapan antuk pikobet sane sampun karincikan ring ajeng, tetujon tetilikan puniki inggih punika:

1. Mangda prasida nelatarang indik pidabdab peplajahan sajeroning kamargiang guru ring *Metode Copy The Master* sane anut anggen nincapang kawagedan nyurat Pupuh Sinom ring sisia kelas XI MIPA 1 SMAN 1 Pekutatan.
2. Mangda prasida nelatarang tata cara *Metode Copy The Master* sane kaanggen nincapang kawagedan nyurat Pupuh Sinom ring sisia kelas XI MIPA 1 SMAN 1 Pekutatan.
3. Mangda prasida nelatarang indik penampen sisia ring kawentenan *Metode Copy The Master* sane kaanggen nincapang kawagedan nyurat Pupuh Sinom ring sisia kelas XI MIPA 1 SMAN 1 Pekutatan.

## 1.6 Kawigunan Tetilikan

Kawigunan telitikan sane mamurda *Metode Copy The Master* kaanggen Nincapang Kawagedan Nyurat Pupuh Sinom ring Sisia Kelas XI MIPA 1 SMAN 1 Pekutatan inggih punika :

### 1.6.1. Kawigunan Pamucuk

Pikolih tetilikan puniki kaaptiang mangda mapikenoh lan mawiguna ring sajeroning panglimbakan widia (*teori*) indik *metode Copy The Master* miwah kaweruhan ring widia paguron-guron, cutetnyane mangda prasida ngamecikang utawi marimurnayang utamanyane peplajahan nyurat pupuh.

## 1.6.2. Kawigunan Panglimbak

Kawigunan panglimbak prasida macihna rikala sepat siku-siku sane kaanggen pacang katelebang. Kawigunan panglimbak ring tetilikan puniki inggih punika:

### 1.6.2.1. Majeng ring Sisia

Kawigunan tetilikan puniki majeng ring sisia inggih punika anggen paweweh utawi ilmu ring sajeroning muputang pikobet paplajahan nyurat pupuh tur ngresepang indik tata cara nyurat pupuh ngantos kawagedan sisia punika nincap.

### 1.6.2.2. Majeng ring Guru Basa Bali

Kawigunan tetilikan puniki majeng ring Guru basa Bali inggih punika prasida uning kawagedan sisia, kaiwangan-kaiwangan, miwah ngicenin paweweh sajeroning makarya pangrencana, tata cara sane patut lan becik anggen nincapang kawagedan sisia ring sajeroning peplajahan nyurat.

### 1.6.2.3. Majeng ring panilik selanturnyane

Kawigunan majeng ring panilik selanturnyane inggih punika prasida kaanggen sepat siku-siku utawi sesuluh ring sajeroning tetilikan selanturnyane sane ngenenin nyurat pupuh.

### 1.6.2.4. Majeng panilik

Pikolih tetilikan puniki, kaanggen dasar majeng ring panilik tiosang mangda prasida dados pratiwimba lan sandingan rikala benjang pungkur ngajahin ring sekolah-sekolah nganggen *metode* peplajahan sane *inovatif*.